



Broj: 01-6-04- 6-2406-~~4~~6/24

Datum: 21. 02. 2025. godine

Na temelju član 61. stav (2) Zakona o upravi („*Službeni glasnik Bosne i Hercegovine*“ broj: 32/02 i 10/09), člana 7. stav (3) Odluke o postupku srednjoročnog planiranja, praćenja i izvještavanja u institucijama Bosne i Hercegovine („*Službeni glasnik Bosne i Hercegovine*“ broj: 62/14), a u skladu sa Mišljenjem Ministarstva finansija i trezora Bosne i Hercegovine broj: 13-02-2-1231-3/25 od 14. 02. 2025. godine, zamjenik ministra sigurnosti Bosne i Hercegovine donosi:

ODLUKU

**o donošenju Srednjoročnog programa rada Ministarstva sigurnosti Bosne i Hercegovine
za period 2025-2027. godina**

Član 1. (Predmet Odluke)


Ovom Odlukom donosi se Srednjoročni programa rada Ministarstva sigurnosti Bosne i Hercegovine za period 2025-2027. godina (u daljem tekstu Srednjoročni program rada).

Član 2. (Objava)

Srednjoročni programa rada iz člana 1. ove Odluke, objavljuje se na internetskoj (web) stranici Ministarstva sigurnosti Bosne i Hercegovine.

Član 3. (Stupanje na snagu)

Ova Odluka stupa na snagu danom donošenja.



ZAMJENIK MINISTRA

Ivica Bošnjak

Dostaviti: - 1 x svim organizacionim jedinicama
- 1 x a/a



MINISTARSTVO SIGURNOSTI BOSNE I HERCEGOVINE

SREDNJOROČNI PROGRAM RADA

2025 – 2027. godina

Dokument je pripremljen u skladu sa Odlukom o postupku srednjoročnog planiranja, praćenja i izvještavanja u institucijama BiH ("Službeni glasnik BiH", broj: 62/14) i Uputstvom o metodologiji u postupku srednjoročnog planiranja, praćenja i izvještavanja u institucijama BiH ("Službeni glasnik BiH", broj: 44/15)

Sarajevo, maj/svibanj 2024. godine

Sadržaj:

Poglavlje 1: Strateški okvir	3
1.2. Mandat institucije	3-4
Poglavlje 2: Vizija i misija	5
2.1. Vizija	5
2.2. Misija	5
Poglavlje 3: Učesnici i partneri.....	5
Poglavlje 4: Osnovna programska opredjeljenja.....	5
4.1. Srednjoročni cilj.....	5
4.2 Prioritet.....	6
4.3. Programi i projekti	6
4.4. Obrazloženje	6-16
Poglavlje 5: Resursi i kapaciteti potrebni za postizanje ciljeva.....	16
5.1. Predviđeni izvori finansiranja	16
5.2. Organizacioni kapaciteti	17
Poglavlje 6: Okvir za praćenje provođenja plana i evaluaciju rezultata.....	17
6.1. Definisanje ključnih pokazatelja	18
6.2. Metode za prikupljanje informacija o pokazateljima	19
6.3. Osnovni zaključci prethodnog Izvještaja o provođenju plana rada	19
Poglavlje 7. Prilozi	20
Prilog 1: Akcioni plan Srednjoročnog programa rada Ministarstva sigurnosti Bosne i Hercegovine	
Prilog 2: Pregled zakona, drugih propisa i razvojno-investicionih projekata / programa, predviđenih Srednjoročnim programom rada Ministarstva sigurnosti Bosne i Hercegovine	

Poglavlje 1: Strateški okvir

U skladu sa Strateškim okvirom za Bosnu i Hercegovinu, mandat Ministarstva sigurnosti Bosne i Hercegovine doprinosi razvoju **dobre uprave i upravljanja u javnom sektoru** kao jednom od općih principa razvoja i osiguranja neophodnog društvenog ambijenta za demokratski, socijalni, ekonomski i svaki drugi razvoj društva u cjelini. U tom procesu, treba osigurati opsežne reforme, saradnju i konsolidaciju sistema, spremnog da odgovori svim društvenim i sigurnosnim izazovima i uporedo s tim, osigura vladavinu prava, jednakosti, opće sigurnosti građana i njihovog nesmetanog pristupa sistemu javnih usluga, uz zaštitu od kriminala i korupcije. Za provođenje ovog cilja, neophodna je efikasna i odgovorna uprava na svim nivoima vlasti u Bosni i Hercegovini.

Strateški cilj

Da bi dale željene rezultate i promijenile sistem upravljanja, reforme se ne mogu planirati i provoditi djelimično, već zahtijevaju koordinirano upravljanje u skladu sa vizijom i postavljenim prioritetima. I upravo na tom principu, u okviru svog mandata, Ministarstvo sigurnosti Bosne i Hercegovine daje doprinos provedbi strateškog cilja – **transparentan, efikasan i odgovoran javni sektor**.

Primjena ovog principa, podrazumjeva odgovorno i efikasno upravljanje u svim institucijama, a posebno onim koje provode sigurnosnu politiku - najvažniju politiku svake države bez koje nema drugih politika – ekonomske, vanjske, odbrambene itd., koje međusobnim djelovanjem oblikuju poželjen ambijent za ostvarenje strateškog cilja ove države – prijema Bosne i Hercegovine u okrilje Evropske unije. Srednjoročni cilj Ministarstva sigurnosti povezan je sa strateškim ciljevima iz Strateškog okvira za Bosnu i Hercegovinu i izveden iz Srednjoročnog programa rada Vijeća ministara Bosne i Hercegovine.

1.2. Mandat institucije

Na osnovu **Zakona o ministarstvima i drugim organima uprave Bosne i Hercegovine** (*"Službeni glasnik BiH"*, broj: 5/03, 42/03, 26/04, 42/04, 45/06, 88/07, 35/09, 59/09, 103/09, 87/12, 6/13 i 83/17), Ministarstvo sigurnosti Bosne i Hercegovine nadležno je za:

- zaštitu međunarodnih granica, unutrašnjih graničnih prijelaza i regulisanje prometa na graničnim prijelazima Bosne i Hercegovine;
- sprečavanje i otkrivanje počinilaca krivičnih djela terorizma, trgovine drogom, krivotvorenja domaće i strane valute, trgovine ljudima i drugih krivičnih djela sa međunarodnim ili međuentitetskim elementom;
- međunarodnu saradnju u svim oblastima iz nadležnosti Ministarstva (saradnja sa INTERPOL-om, EUROPOL-om, SELEC-om, MARRI-em itd);
- zaštitu lica i objekata;
- prikupljanje i korištenje podataka od značaja za sigurnost Bosne i Hercegovine;
- organizaciju i usaglašavanje aktivnosti entitetskih ministarstava unutrašnjih poslova i Brčko Distrikta Bosne i Hercegovine u ostvarivanju sigurnosnih zadataka u interesu Bosne i Hercegovine;
- provođenje međunarodnih obaveza i saradnju u provođenju civilne zaštite, koordiniranje djelovanja entitetskih službi civilne zaštite u BiH i usklađivanje

- njihovih planova u slučaju prirodnih nesreća, koje zahvataju teritoriju Bosne i Hercegovine, te donošenje programa i planova zaštite i spašavanja;
- kreira, stara se i provodi politiku useljavanja i azila u Bosni i Hercegovini;
- uređuje procedure i način organizacije službe, vezano za kretanje i boravak stranaca u Bosni i Hercegovini;
- pružanje podrške policijskim tijelima Bosne i Hercegovine;
- školovanje i stručno usavršavanje kadrova u skladu s potrebama policijskih tijela Bosne i Hercegovine i drugih službi i agencija iz oblasti sigurnosti;
- forenzička ispitivanja i vještačenja;

Također, Ministarstvo sigurnosti Bosne i Hercegovine je Odlukom Vijeća ministara Bosne i Hercegovine, određeno kao Državno sigurnosno tijelo koje prati provedbu *Zakona o zaštiti tajnih podataka* i drugih propisa, donesenih na temelju pomenutog akta i kao Državno tijelo za informatičku sigurnost prilikom prijenosa tajnih podataka (*"Službeni glasnik BiH"*, broj: 38/06).

U sastavu ovog Ministarstva, kao upravne organizacije djeluju:

- Direkcija za koordinaciju policijskih tijela Bosne i Hercegovine;
- Granična policija Bosne i Hercegovine;
- Državna agencija za istrage i zaštitu Bosne i Hercegovine;
- Agencija za forenzička ispitivanja i vještačenja Bosne i Hercegovine;
- Agencija za školovanje i stručno usavršavanje kadrova Bosne i Hercegovine;
- Agencija za policijsku podršku Bosne i Hercegovine;
- Služba za poslove sa strancima Bosne i Hercegovine.

Važna uloga Ministarstva sigurnosti ogleda se u procesima provedbe strateških dokumenata na nivou Bosne i Hercegovine, u skladu sa zahtjevima i potrebama Evropske unije, poput Strategije integrisanja Bosne i Hercegovine u Evropsku uniju, Strategije reforme javne uprave itd.

Spisak važećih i planiranih strateških dokumenata Ministarstva sigurnosti

Važeći strateški dokumenti su: Strategija Bosne i Hercegovine za prevenciju i borbu protiv terorizma i njen Akcioni plan; Procjena rizika od pranja novca i finansiranja terorizma u Bosni i Hercegovini i njen Akcioni plan; Strategija za sprečavanje pranja novca i finansiranja terorističkih aktivnosti u Bosni i Hercegovini i njen Akcioni plan; Državna strategija za rad na predmetima ratnih zločina; Strategija Bosne i Hercegovine za borbu protiv organizovanog kriminala sa pripadajućim Akcionim planom; Državna strategija nadzora nad opojnim drogama, sprečavanja i suzbijanja zloupotrebe opojnih droga u BiH i Državni akcioni plan borbe protiv zloupotrebe opojnih droga; Strategija u oblasti migracija i azila i njen Akcioni plan; Migracioni profil Bosne i Hercegovine; Strategija suprostitavljanja trgovini ljudima i njen Akcioni plan; Strategija i Akcioni plan integrisanog upravljanja granicom u Bosni i Hercegovini; Strategija i Akcioni plan za kontrolu malog oružja i lakog naoružanja u Bosni i Hercegovini; Strategija smanjenja rizika od katastrofa i pripadajući Akcioni plan; Revidirani plan integriteta Ministarstva sigurnosti Bosne i Hercegovine, te strateški dokument u oblasti kompjuterske sigurnosti, u skladu sa NIS Direktivom EU.

Poglavlje 2: Vizija i misija

2.1. Vizija

Efikan sistem sigurnosti sa uspješnom koordinacijom policijskih agencija u cilju nesmetanog funkcionisanja sigurnosnog sektora u Bosni i Hercegovini u koji građani imaju povjerenje i koji osigurava pristup Evropskoj uniji.

2.2. Misija

Ministarstvo sigurnosti se bavi uspostavom i održavanjem modernog zakonodavnog okvira, unapređenjem međunarodne saradnje i provođenjem aktivnosti u oblastima koordinacije, zaštite granica, migracija i azila, zaštite i spašavanja, zaštite tajnih podataka, zaštite elektronskih podataka, primjene IKT sistema, opće sigurnosti, borbe protiv svih oblika kriminala, terorizma, korupcije i ratnih zločina u cilju stvaranja sigurnog okruženja za sve građane BiH.

Poglavlje 3: Učesnici i partneri

Ministarstvo ostvaruje stalnu komunikaciju i saradnju sa svojim upravnim organizacijama (Agencijom za istrage i zaštitu, Graničnom policijom, Direkcijom za koordinaciju policijskih tijela, Službom za poslove sa strancima, Agencijom za forenzička ispitivanja i vještačenja, Agencijom za školovanje i stručno usavršavanje kadrova i Agencijom za policijsku podršku), institucijama Bosne Hercegovine, entitetskim ministarstvima, drugim organima/tijelima BiH, međunarodnim sigurnosnim institucijama i drugim međunarodnim organizacijama. Partneri Ministarstva su i predstavnici akademske zajednice, nevladinih i međunarodnih organizacija, posebno u oblasti izrade i finansiranja određenih programa i projekata.

Poglavlje 4: Osnovna programska opredjeljenja

4.1. Srednjoročni cilj

U okviru strateškog cilja – **Transparentan, efikasan i odgovoran javni sektor** u skladu sa Strateškim okvirom za Bosnu i Hercegovinu, Ministarstvo je definisalo svoj srednjoročni cilj – **Unapređenje sigurnosnog sektora u nadležnosti institucija Bosne Hercegovine, sa aspekta odgovornosti i efikasnosti**. To podrazumjeva efikasnu organizaciju, međuresornu i međuagencijsku saradnju i koordinaciju, pravovremeno i optimalno planiranje, određivanje prioriteta i raspodjelu resursa, opremanje i održavanje sredstava, obučavanje i stručno usavršavanje snaga, te njihovu spremnost za izvršavanje dodjeljenih poslova i zadataka. Da bi Ministarstvo sigurnosti Bosne i Hercegovine ispunilo sve svoje obaveze na putu ka evropskim integracijama, te ispunilo očekivanja građana, svojih uposlenika i ključnih partnera, mora da usmjeri sve raspoložive resurse u kontinuirano institucionalno jačanje i planiranje budućeg razvoja.

4.2. Prioritet

Iz strateškog cilja proizilazi prioritetan cilj – **Ojačati vladavinu prava, sigurnost i osnovna prava**. Ubrzanje procesa tranzicije je ključno za napredak Bosne i Hercegovine na evropskom putu, kako bi nadoknadili izgubljeno vrijeme i smanjili zaostajanje za ostalim zemljama regije i taj opsežan posao, pored izgradnje savremenih institucija, podrazumjeva i reformu javnih finansija, planiranje, raspodjelu resursa, te usvajanje i harmonizaciju propisa sa propisima Evropske unije.

4.3. Program i projekti

Ostvarivanje srednjoročnog cilja zasniva se na realizaciji strateškog cilja i prioriteta, te provođenju programa i projekata. Da bi realiziralo planirane aktivnosti, Ministarstvo je definisalo sljedeći program:

- Odgovoran i efikasan sigurnosni sektor i saradnja sa međunarodnim institucijama u oblasti sigurnosti

Program je instrument za realizaciju ciljeva i sastoji se od projekata ili skupa kompatibilnih aktivnosti, koje vode ka ostvarenju zajedničkog cilja. Projekti koji čine navedeni program, vezani su za misiju i nadležnosti Ministarstva.

Detaljan pregled programa i projekata Ministarstva za naredno srednjoročno razdoblje 2025-2027. godina, prikazan je u Prilogu 1 – Akcioni plan Srednjoročnog programa rada Ministarstva sigurnosti Bosne i Hercegovine.

4.4. Obrazloženje

PROGRAM: Odgovoran i efikasan sigurnosni sektor i saradnja sa međunarodnim institucijama u oblasti sigurnosti

Samo odgovoran i efikasan sigurnosni sistem sa svojim ciljevima, snagama, sredstvima, dinamikom operacionalizacije i realizacije operativnih zadataka u okolnostima kada se donose odgovorne i racionalne odluke, može osigurati zaštitu temeljnih vrijednosti Bosne i Hercegovine, njenu stabilnost i sigurnost pred svim oblicima unutrašnjeg i vanjskog ugrožavanja. Taj sistem počiva na permanentnoj analizi sigurnosnog okruženja, mogućim prijetnjama i rizicima, definiciji principa i interesa koji se žele ostvariti u zaštiti državne sigurnosti na jednoj, te međunarodnoj policijskoj saradnji na drugoj strani.

Ovaj program, ostvaruje se realizacijom sljedećih projekata:

- **Praćenje i analiza granične i opće sigurnosti;**
- **Praćenje, analiza i koordinacija u oblastima: korupcije i organizovanog kriminala, terorizma, ratnih zločina i zloupotrebe narkotika;**
- **Provedba politika u oblasti imigracija i azila;**

- Međunarodna saradnja, evropske integracije i aktivnosti na suprostavljanju trgovine ljudima;
- Održavanje i razvoj IKT sistema u sigurnosnom sektoru;
- Zaštita i spašavanje
- Razvijanje sistema za zaštitu tajnih podataka;
- Planiranje, upravljanje i koordinacija poslova;

U domenu granične i opće sigurnosti - najvažnijem segmentu sigurnosti svake države, pa tako i Bosne i Hercegovine, koji direktno utiče na unutrašnju i ukupnu sigurnost, akcenat će biti na usvajanju **Zakona o graničnoj kontroli Bosne i Hercegovine, te izradi podzakonskih akata (6 pravilnika)**, koji će proisteći iz pomenutog akta. Ovim Zakonom, uređuje se kontrola i prelazak državne granice Bosne i Hercegovine, granični prijelazi, granična linija, zaštitno područje, prijenos i kontrola prijenosa oružja i municije preko državne granice, te druga pitanja vezana za graničnu kontrolu. Uporedo s tim, očekuje se donošenje **Odluke o određivanju graničnih prijelaza u Bosni i Hercegovini**, kojom se definiše njihova kategorija, vrijeme rada i organi nadležni za obavljanje kontrole najavljenog prelaska državne granice.

Najveće sigurnosne prijetnje se upravo javljaju u oblastima nadzora državne granice i graničnih provjera, usljed specifičnog, geopolitičkog položaja Bosne i Hercegovine. Ove prijetnje, ujedno nameću veću saradnju i koordinaciju nadležnih institucija u provođenju mjera iz strateških dokumenata, a jedan od njih je i **Strategija integrisanog upravljanja granicom**, čiji se **Akcioni plan priprema za period 2026 – 2027. godina**. Tu su i drugi strateški akti, koji proizilaze iz Zakona o kontroli kretanja oružja i vojne opreme u Bosni i Hercegovini, čije provođenje redovno prati Ministarstvo sigurnosti: **Strategija za kontrolu malog oružja i lakog naoružanja i njen Akcioni plan za period 2025-2030. godina**, potom **Akcioni plan za provođenje Strategije za kontrolu malog oružja i lakog naoružanja za period 2025-2026. godina**, te **Akcioni plan za provođenje Strategije za kontrolu malog oružja i lakog naoružanja za period 2027-2028. godina**.

Svaki od navedenih dokumenata, usklađen je sa uredbama Evropskog parlamenta i Evropskog Vijeća u domenu granične sigurnosti, te OSCE-ovim konceptom granične sigurnosti, obavezujućim za sve zemlje članice pomenute organizacije. Nastavak aktivnosti na jačanju kontrole državnih granica, obuhvata i izradu nove **Odluke o formiranju međuagencijske Radne grupe za koordinaciju aktivnosti na definisanju, usklađivanju i stvaranju zakonodavnih, operativnih, tehničkih, kadrovskih i finansijskih uslova za implementaciju API/PNR sistema**.

U pitanju je uspostava sistema za razmjenu podataka o putnicima, koja će se provoditi uz podršku Međunarodne organizacije za migracije (IOM BiH) i Centra za međunarodnu pravnu saradnju (CILC - Center for International Legal Cooperation), u sklopu projekata *„Instrument za izgradnju kapaciteta na Zapadnom Balkanu za integrisano upravljanje granicom (WBIBM)“* i *„IPA 2019/Countering Serious Crime in the Western Balkans“*.

U okviru regionalne saradnje, planirano je sklapanje **Ugovora o graničnim prijelazima i Ugovora o dopunama Ugovora između Bosne i Hercegovine i Republike Hrvatske o graničnim prijelazima, te Odluke između Vijeća ministara Bosne i Hercegovine i Vlade Republike Srbije o formiranju mješovitih komisija za praćenje sporazuma o graničnim prijelazima, pograničnom saobraćaju i zajedničkim lokacijama na graničnim prijelazima**, koji su potpisani u julu 2021. godine.

Ilegalne migracije, njihovi trendovi i popratne pojave, ostaju u fokusu aktivnosti Ministarstva sigurnosti i u narednom srednjoročnom periodu. Tim prije, što rat na Bliskom istoku i višestruke izborne kampanje u mnogim zemljama, uključujući SAD i Veliku Britaniju, otvaraju prostor za novi talas migranata iz Južne i Jugozapadne Azije ka evropskom kontinentu. U središtu ovih kampanja je sporna imigraciona politika i stoga se, realnim čine predviđanja da će mnogi migranti krenuti na put ka Evropi, prije nego se promjene postojeći sistemi i nove migracione mjere stupe na snagu.

U namjeri da riješi problem postojećih i priliv novih migranata, Ministarstvo će preduzeti niz aktivnosti i mjera na jačanju institucionalnih kapaciteta, kako pravnih i kadrovskih, tako i materijalno-tehničkih u oblasti imigracija i azila, te uporedo s tim, jačati i razvijati odnose sa državama koje su izvor migracija. Kao što je poznato, Bosna i Hercegovina je bila prva država u regionu koja je 31. jula. 2022. godine zvanično počela deportaciju migranata koji nezakonito borave na njenom prostoru (u pitanju su bili državljani Pakistana) i taj proces će biti nastavljen i u narednom periodu u skladu sa dinamikom pregovora sa državama iz kojih dolaze veće skupine migranata i zaključenja sporazuma o readmisiji lica koja borave bez dozvole u Bosni i Hercegovini.

Od zemalja visokog migracijskog rizika, u narednom periodu, očekuje se potpisivanje Sporazuma o readmisiji sa Vladom Libanske Republike, te eventualno Memoranduma o razumjevanju sa Narodnom Republikom Bangladeš. Naime, u okviru WBCAP projekta, održan je sastanak sa predstavnicima Bangladeša, koji su iskazali interes za zaključivanje memoranduma o regulaciji radnih migracija za svoje državljane. U narednom periodu, očekuje se nastavak započetih razgovora u namjeri da u njihovom središtu bude povratak državljana Bangladeša u matičnu zemlju, a potom bi posebnim memorandumom bilo riješeno i pitanje radnih migracija.

U ovom momentu nemamo veliki broj migranata koji se zadržavaju ili su na neki način "zapeli" na svom putovanju kroz Bosnu i Hercegovinu (u 2023. godini odobren je privremeni boravak za 13.481 stranca, što u odnosu na 2022. godinu kada je odobreno 11.188 privrenih boravaka u našoj državi, predstavlja povećanje za 20,50%), ali migracije su stalna pojava sa neprestanim promjenama, koje nameću preduzimanje sljedećih mjera: jačanje zaštite i nadzora državne granice i unapređenje sistema sveobuhvatnog upravljanja politikama migracija i azila, otklanjanje slabosti u oblastima kontrole ulaska i boravka stranaca, sistema za cjelovito prikupljanje i obradu raspoloživih podataka, dalji razvoj biometrije u području viza, boravišnih dozvola i azila, te uspostavu sistema za praćenje integracije stranaca koji zakonito borave u našoj državi. Uz navedene mjere, za uspješnu borbu protiv nezakonitih migracija, potrebno je osigurati dodatne kapacitete za smještaj migranata koji se po potrebi mogu dislocirati na drugu lokaciju, te izradu referalnih mehanizama za praćenje pokazatelja u ovoj oblasti.

Dalja dogradnja pravnih kapaciteta u periodu 2025–2027. godina, obuhvata usvajanje **Zakona o izmjenama i dopunama Zakona o strancima, te Pravilnika o izmjenama i dopunama Pravilnika o ulasku i boravku stranaca.**

Zakonom o strancima, regulisani su uslovi i postupak ulaska stranaca u Bosnu i Hercegovinu, njihov prihvata i stavljanje pod nadzor, vizni i bezvizni režim, putne isprave, boravak i udaljenje stranaca iz Bosne i Hercegovine i druga pitanja. Zakon o strancima i podzakonski akti bazirani na ovom propisu, kontinuirano se usklađuju sa pravnom stečevinom Evropske unije.

Ministarstvo svaka tri mjeseca priprema i prosljeđuje Vijeću ministara BiH na usvajanje **Informaciju o stanju u oblasti migracija u Bosni i Hercegovini**, te svake godine izrađuje **Migracioni profil Bosne i Hercegovine**. Ovaj dokument, predstavlja jedan od uvjeta iz Mape puta Evropske unije i pruža detaljan uvid u kretanja i ključne trendove migracija. Uz to se, kontinuirano, na godišnjem nivou izrađuje i **Odluka o najmanjem iznosu sredstava, potrebnom za izdržavanje stranaca za vrijeme namjeravanog boravka u Bosni i Hercegovini**, te pripremaju posebne informacije i analize stanja u ovoj oblasti.

Težište aktivnosti Ministarstva u oblasti azila i dalje će biti usmjereno na stvaranje svih preduvjeta za tražitelje azila u Bosni i Hercegovini, u skladu sa međunarodnim standardima. Na tim principima, baziran je i **Zakon o izmjenama i dopunama Zakona o azilu**, čije je donošenje planirano tokom 2025. godine, **te podzakonskih akata**, koji će proistići iz navedenog zakona. Ovim aktom, preciznije se definišu prava i obaveze tražitelja azila, izbjeglica i stranaca pod supsidijarnom zaštitom, te druga važna pitanja iz ove oblasti. Nastavljaju se i aktivnosti na opremanju i održavanju azilantskih objekata, te provedbi IPA projekta: **“Regionalna podrška zaštitno-osjetljivim sistemima upravljanja migracijama na Zapadnom Balkanu i u Turskoj”**.

Pravni i strateški dokumenti, poput buduće i postojeće **Strategije u oblasti migracija i azila za period 2021 – 2025. godina**, počivaju na četiri osnovna principa politike migracija i azila naše države: zakonitosti, sigurnosti države i njenih građana, integracija i međunarodne saradnje. Koordinaciju aktivnosti između institucija u oblasti migracija i azila, vrši Koordinaciono tijelo za pitanja migracija u Bosni i Hercegovini u kome se pored ostalih, nalaze i predstavnici štabova na nivou entiteta i Brčko Distrikta. U slučaju nastanka ili pak očekivanja vanrednih kriznih situacija, ovo Koordinaciono tijelo zasjeda kao Operativni štab za pitanja migracija i azila Bosne i Hercegovine.

Prevenција i borba protiv terorizma i dalje će biti visoko na listi prioriteta Ministarstva, kao dio obaveza koje je Bosna i Hercegovina preuzela na međunarodnom planu kao članica Antiterorističke koalicije 2001. godine, te obaveza koje proizilaze iz Sporazuma o stabilizaciji i pridruživanju sa Evropskom unijom. Ovi sporazumi, obuhvataju čitav niz globalnih sigurnosnih izazova: stranih terorističkih boraca, nasilnog ekstremizma i zločina, govora mržnje, te zloupotrebe interneta u terorističke svrhe.

Na temelju tih principa i preporuka, Parlamentarna skupština Bosne i Hercegovine, usvojila je polovinom februara 2024. godine **Zakon o sprečavanju pranja novca i finansiranju terorističkih aktivnosti**, što je ujedno, bio **jedan od ključnih uvjeta Evropskog vijeća za donošenje odluke o otvaranju pristupnih pregovora s Bosnom i Hercegovinom 21. marta 2024. godine**.

Ovim zakonom, definišu se mjere i odgovornosti Finansijsko obavještajnog odjela Državne agencije za istrage i zaštitu (SIPA), drugih državnih organa, obveznika i pravnih lica sa javnim ovlaštenjima u pogledu prevencije, otkrivanja i istraživanja slučajeva pranja novca i finansiranja terorističkih aktivnosti, te norme međunarodne

saradnje. Pranje novca i finansiranje terorističkih aktivnosti, ugrožava ekonomske interese svake države koja želi pouzdan finansijski sistem, snažan privredni sektor, pravedno tržište rada i efikasnu tržišnu ekonomiju, ali ujedno ometa i razvoj ključnih državnih struktura kao što su: obrazovanje, zdravstvo, društvena sigurnost, javni red i mir, saobraćajna mreža itd.

Dalja dogradnja pravnih kapaciteta i njihovo usaglašavanje sa zahtjevima Vijeća sigurnosti UN-a i Vijeća Evrope, obuhvata provođenje systemske analize, te materijalnih i procesnih normi krivičnog zakonodavstva Bosne i Hercegovine. To se prvenstveno odnosi na usklađivanje kapaciteta ove države sa zahtjevima FATF-a (Organizacije za kontrolu i sprečavanje pranja novca – Financial Action Task Force on Money Laundering) i MONEYVAL-a (Komiteta za evaluaciju mjera za sprečavanje pranja novca i finansiranja terorizma - Committee of Experts on the Evaluation of Anti-Money Laundering Measures and the Financing of Terrorism).

Suština zahtjeva pomenutih međunarodnih tijela, podrazumjeva veći angažman nadležnih institucija, posebno u oblasti zloupotrebe neprofitnog sektora, te istrage sumnjivih investicija, što neminovno nalaže usvajanje **Prijedloga Pravilnika o provođenju Zakona o sprečavanju pranja novca i finansiranja terorističkih aktivnosti**. (Treća Direktiva FATF-a na koju se oslanja pomenuto rješenje, definira iznos od 15 000 EUR-a za gotovinska plaćanja u trgovini robom, dok Četvrta Direktiva spušta navedeni prag u iznosu od ili iznad 10 000 EUR-a).

Preporuke FATF-a, ujedno nalažu izradu **Procjene rizika od pranja novca i finansiranja terorizma u Bosni i Hercegovini za period 2024-2026. godina i njenog Akcionog plana**, koju je Vijeće ministara Bosne i Hercegovine usvojilo 01. 02. 2024. godine. Naime, sve analize i procjene rizika govore da je u našoj državi najviše zloupotrijebljen bankarski sektor, Western union i sektor nekretnina tj. prodaja privatne imovine u cilju odlaska stranih terorističkih boraca na strana ratišta. Ovi sektori koriste se za navedenu namjenu kroz odvijanje novčanih transakcija koje baš i ne odstupaju od uobičajenih transakcija, koje se obavljaju u sklopu svakodnevnih životnih potreba. Navedeni dokumenti ujedno, tretiraju i stanje u nevladinom sektoru (NVO), gdje su uočeni određeni nedostaci u smislu da je uspostavljen jedinstveni registar, ali on nije u potpunosti funkcionalan.

Slijedi i nastavak aktivnosti na ispunjavanju smjernica i preporuka, navedenih u **Mišljenju o zahtjevu Bosne i Hercegovine za članstvo u Evropskoj uniji**. Prema posljednjem, **Analitičkom izvještaju Evropske komisije o situaciji u Bosni i Hercegovini**, ova država ima određeni nivo spremnosti za borbu protiv organizovanog kriminala i korupcije, ali su potrebne značajnije mjere i aktivnosti u finansijskim istragama, povezanim sa pranjem novca i sistemom javnih nabavki.

Jačanje kapaciteta iz domena borbe protiv terorizma, podrazumjeva i donošenje **Odluke o usvajanju Plana civilno-vojne saradnje u slučaju odgovora na terorističke napade i saniranje njihovih posljedica, u skladu sa zakonskim nadležnostima**, te pripremu **Standardne operativne procedure**. Pomenutim Planom, utvrđuje se organizacija i način djelovanja civilnih institucija na svim nivoima vlasti u domenu zaštite i spašavanja ljudi i materijalnih dobara od posljedica terorističkih napada, te podrška Oružanih snaga Bosne i Hercegovine civilnim institucijama u odgovoru na terorističke akte. Na taj način se dobrim planskim mjerama nastoje spriječiti ili pak minimalizirati posljedice mogućih terorističkih udara (konvencionalnim ili nekonvencionalnim ubojitim sredstvima), uz povećanu spremnost institucija Bosne i Hercegovine, entiteta i Brčko Distrikta za suočavanje sa ovom globalnom prijetnjom.

Planiranim aktivnostima treba dodati i izradu **Procjene rizika od finansiranja širenja oružja za masovno uništenje za period 2023-2027. godina i njegovog Akcionog plana**, u kome se posebno tretira novi oblik asimetrične prijetnje tj. kibernetički napad s mogućim efektima oružja za masovnu upotrebu na stanovništvo i materijalna dobra. Vijeće ministara Bosne i Hercegovine je prethodno, usvojilo **Strategiju Bosne i Hercegovine za prevenciju i borbu protiv terorizma 2021-2026. godina** („Službeni glasnik BiH“, broj: 8/23) i njen **Akциони plan** („Službeni glasnik BiH“, broj: 71/23), te **Odluku o formiranju Koordinacionog tijela za praćenje primjene pomenutih strateških akata** („Službeni glasnik BiH“, broj: 85/23). Potom slijedi izrada dva pozakonska akta koji će omogućiti kreiranje i primjenu nove strategije, odnosno **Odluke o uspostavi Radne grupe za izradu Strategije za prevenciju i borbu protiv terorizma 2027- 2031. godina i Odluke o usvajanju Strategije za prevenciju i borbu protiv terorizma 2027-2031. godina.**

Ključni prioriteti **Strategije za prevenciju i borbu protiv terorizma 2027-2031. godina**, podijeljeni su u nekoliko kategorija (otkrivanje i odvracanje, razmjena podataka i razvoj znanja), te ukazuju na potrebu sveobuhvatnog i sistemskog pristupa u njenoj primjeni, posebno primjeni preventivnih mjera, koje uključuju širok spektar sigurnosnih, te vladinih i nevladinih institucija u procesu prevencije i borbe protiv terorizma. Tim prije, što su prethodni strateški dokumenti bili više fokusirani na terorizam inspirisan ISIL-om i nisu u dovoljnoj mjeri tretirali druge, pojavne oblike nasilnog ekstremizma i radikalizacije, koji vode ka terorizmu. Za primjenu navedenih, stateških dokumenata, te kreiranje novih programa i projekata, zaduženo je **Koordinaciono tijelo kao stručno tijelo Vijeća ministara Bosne i Hercegovine, koje se formira posebnom odlukom.**

U okviru saradnje sa UN-om, redovno se prate aktivnosti Vijeća sigurnosti UN-a u dijelu izmjena pravnih propisa, vezanih za terorizam i borbu protiv stranih terorističkih boraca. Redovno se ažuriraju tzv. crne liste osoba i nedržavnih entiteta, koje se dovode u vezu sa terorističkim organizacijama (aktivirana je e-mail adresa: restriktivne.mjere@msb.gov.ba u cilju brže i efikasnije provedbe restriktivnih mjera Vijeća sigurnosti UN-a.

Poseban izazov za Bosnu i Hercegovinu predstavljaju njeni državljani - povratnici iz zona sukoba Sirije i Iraka, koji nema samo sigurnosnu, nego i humanitarnu dimenziju i zahtjeva saradnju institucija na svim nivoima vlasti. U skladu s tim, Ministarstvo sigurnosti je izradilo **Plan repatrijacije i Program reintegracije, rehabilitacije i resocijalizacije državljana Bosne i Hercegovine, povratnika iz zona sukoba Sirije i Iraka** („Službeni glasnik BiH“, broj: 69/22). U isto vrijeme, provodeći mjere na suzbijanju govora mržnje ovo Ministarstvo provodi proces prikupljanja podataka za izradu **Godišnjeg izvještaja o krivičnim djelima, počinjenim iz mržnje za 2023. godinu.**

Saradnja sa Evropskom unijom, podrazumjeva i obavezu dostavljanja **Izvještaja po Zajedničkom akcionom planu za borbu protiv terorizma na Zapadnom Balkanu**, za koji Ministarstvo sigurnosti prikuplja i objedinjava podatke od nadležnih institucija, te je do sada dostavljeno ukupno 6 izvještaja. Pri čemu, treba naglasiti da je ostvaren određeni napredak u ovoj oblasti, te izražena spremnost za dalji rad na pomenutom dokumentu, njegovom ažuriranju (u okviru Taix misije) i provođenju zacrtanih ciljeva.

U skladu sa datim obavezama, provođenje preporuka GRECO-a - Grupe zemalja za borbu protiv korupcije u Vijeću Evrope (The Group of States Against Corruption) je važan korak u procesu pridruživanja naše države Evropskoj uniji, a Ministarstvo sigurnosti u tom pogledu treba zadržati svoju leadersku ulogu i u narednom

srednjoročnom periodu 2025-2027. godina. Liderska pozicija Ministarstva sigurnosti proizilazi iz same teme Petog kruga GRECO evaluacije ***“Sprečavanje korupcije i promovisanje integriteta u centralnoj vlasti / vladi (najviše izvršne funkcije) i agencijama za provođenje zakona na nivou države”***.

U okviru navedene teme, predmet evaluacije je Predsjedništvo Bosne i Hercegovine i Vijeće ministara Bosne i Hercegovine, Agencija za istrage i zaštitu Bosne i Hercegovine (SIPA) i Granična policija Bosne i Hercegovine. ***Izvještaj o evaluaciji Bosne i Hercegovine u Petom krugu evaluacije GRECO-a (Evaluation Report on Bosnia and Herzegovina)***, usvojen je na 92. plenarnoj sjednici GRECO-a, održanoj u Strasbourgu, u periodu od 28. novembra do 2. decembra 2022. godine. Slijedom nalaza sadržanih u navedenom Izvještaju, GRECO je uputio ukupno 25 preporuka Bosni i Hercegovini u obje evaluacijske teme. U odnosu na centralnu vlast (najviše izvršne funkcije) GRECO je dao 14 preporuka, dok se 11 preporuka odnosi na agencije za provođenje zakona na državnom nivou.

Potom je, ***Drugi privremeni izvještaj o usklađenosti Bosne i Hercegovine sa preporukama GRECO-a u Četvrtom krugu evaluacije (Second Interim Compliance Report on Bosnia and Herzegovina)***, usvojen na 93. plenarnoj sjednici GRECO-a, održanoj od 20. do 24. marta 2023. godine. Tom prilikom, GRECO je zaključio da je Bosna i Hercegovina ostvarila mali i veoma ograničen napredak u provedbi datih preporuka. Samo jedna od petnaest preporuka, sadržanih u ***Izvještaju o evaluaciji u Četvrtom krugu evaluacije***, provedena je na zadovoljavajući način, a ***Dodatnu informaciju u vezi provođenja preporuka GRECO-a u Četvrtom krugu evaluacije***, potrebno je dostaviti Sekretarijatu GRECO-a, najkasnije do 31. maja 2024. godine.

Kroz poseban postupak za procjenu usklađenosti, GRECO će procijeniti ostvareni stepen usklađenosti sa datim preporukama, dok će ***Treći privremeni izvještaj o usklađenosti Bosne i Hercegovine sa preporukama GRECO-a u Četvrtom krugu evaluacije***, biti razmatran na 98. plenarnoj sjednici GRECO-a, koja će biti održana od 18. do 22. novembra 2024. godine. Neprovođenje preporuka GRECO-a može imati negativan uticaj na kredibilitet Bosne i Hercegovine u međunarodnim odnosima, te je neophodna maksimalna posvećenost svih nadležnih institucija, prilikom preduzimanja aktivnosti na provođenju GRECO preporuka.

U domenu borbe protiv zloupotrebe narkotika, Ministarstvo koordinira aktivnosti na izradi ***Zakona o izmjenama i dopunama Zakona o sprečavanju i suzbijanju zloupotrebe opojnih droga***, te ***Odluke o dopuni Liste opojnih droga, psihotropnih tvari, biljaka iz kojih se može dobiti opojna droga i prekursora***. Tim prije, što analize Kancelarije za pitanja droge i kriminala Ujedinjenih nacija (UNDOC-a - United Nations Office on Drugs and Crime) ukazuju da je ugroženost Bosne i Hercegovine od ovog oblika kriminala realna i očekivana, ali njegova rasprostranjenost nije dovoljno istražena u pojedinim oblicima i daje se isključivo na bazi procjene, dobijene na osnovu obavještajnih podataka, prikupljenih operativnim radom policijskih službenika, te statističkih podataka o osobama koje su prijavljene nadležnim tužilaštvima.

U planu je i izrada ***Pravilnika o izmjenama i dopunama Pravilnika o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekursora***, kojim se određuje mjesto i način čuvanja, te postupak i način uništavanja ovih supstanci. Zbog mogućnosti stalnih inovacija na polju kreiranja novih psihoaktivnih tvari i njihovog pojavljivanja na tržištu u veoma kratkom roku, što

ostavlja prazninu u postojećim aktima, planirana je uspostava **Sistema ranog upozoravanja na pojavu novih psihoaktivnih tvari u Bosni i Hercegovini**, odnosno izrada **Uputstva o sistemu ranog upozoravanja na pojavu novih psihoaktivnih supstanci u Bosni i Hercegovini**.

Prethodno je usvojena **Odluka o prestanku važenja Odluke o izmjenama i dopunama Odluke o osnivanju i imenovanju članova Komisije za suzbijanje zloupotrebe opojnih droga** (*"Službeni glasnik BiH"*, broj: 54/08), uz **Odluku o izmjeni i dopune Odluke o osnivanju i imenovanju članova Komisije za suzbijanje zloupotrebe opojnih droga** (*"Službeni glasnik BiH"*, broj: 29/24), na osnovi kojih je imenovan novi saziv ove Komisije.

Kontinuirano se prati primjena strateških dokumenata iz ove oblasti i ujedno vrše pripreme za izradu **Strategije o sprečavanju i suzbijanju zloupotrebe opojnih droga za period 2024 - 2028. godina, te njenog Akcionog plana**. Ne izostaje ni stručna i administrativna pomoć Komisiji za suzbijanje zloupotrebe opojnih droga i Komisiji za uništavanje opojnih droga. Ministarstvo ujedno, provodi i međunarodne obaveze Bosne i Hercegovine iz ovog domena i o tome redovno izvještava međunarode organizacije, poput UN-ovog Ureda za droge i kriminal (UNODC-a), Evropskog centra za praćenje droga i zavisnosti o drogama (EMCDDA), Međunarodnog odbora za kontrolu opojnih droga (INCB-a), te Grupe za saradnju u borbi protiv zloupotrebe opojnih droga i nezakonite trgovine opojnim drogama – Pompidou grupe Vijeća Evrope.

U narednom srednjoročnom periodu akcenat će biti i na borbi protiv trgovine ljudima, kao jednom od najperfidnijih oblika kriminala, koji oduzima ljudsko dostojanstvo i ostavlja trajne posljedice na njegove žrtve. Ovaj proces, zahtjeva angažman šire društvene zajednice i saradnju koordinacionih timova na državnom, entitetskom, kantonalnom i nivou Brčko Distrikta, kao spona koje jačaju funkcionalne veze i saradnju nadležnih organa vlasti i nevladinih organizacija. Ministarstvo svake godine izrađuje **Izvještaj o stanju u oblasti borbe protiv trgovine ljudima**, te provodi strateške i druge dokumente, zasnovane na pet strateških ciljeva: podrška, prevencija, zaštita žrtava, krivično gonjenje počinitelja krivičnog djela, te partnerstvo. Provođenjem ovih ciljeva i politika, Bosna i Hercegovina će ispuniti obaveze iz niza međunarodnih dokumenata, sporazuma, konvencija, te preporuka Evropskog parlamenta (Direktiva 2011/ 36/ EU), Vijeća Evrope, Evropske komisije (dio uvjeta, vezanih za članstvo naše države u Evropskoj uniji), te Državnog sekretarijata SAD-a.

Evropska unija je kroz IPA projekte, usmjerena na strateško raspoređivanje pomoći Bosni i Hercegovini. Kako bi pomoć bila adekvatno planirana i realizovana u sektoru unutrašnjih poslova, Ministarstvo nastoji da IPA projekti budu usklađeni sa ciljevima i aktivnostima, koji su trenutno u fazi provedbe ili pripreme i koji su predviđeni tekućim strateškim dokumentima u oblastima nadzora, opremanja i upravljanja državnom granicom, migracijama, azilom, te borbom protiv krijumčarenja migranata i drugim oblicima kriminala.

Ministarstvo također, koordinira aktivnosti vezane za primjenu Konvencije o policijskoj saradnji u Jugoistočnoj Evropi, učestvuje u izradi novih radnih programa za njenu primjenu, prisustvuje sastancima Ekspertne radne grupe i priprema učešće delegacije Bosne i Hercegovine na sastancima Komiteta ministara. U narednom trogodišnjem periodu, izradiće se **Prijedlog nove Sigurnosne strategije Bosne i Hercegovine**. Ovaj dokument, analizira izazove sa kojima se država suočava, definiše sigurnosne ciljeve i prioritete, te primjenom svih elemenata moći ove države, ostvaruje mir,

sigurnost i prosperitet svih njenih građana. Sigurnosnu politiku razmatra izvršna vlast Bosne i Hercegovine, koja ima sposobnost, da koordinira primjenu obavještajno – sigurnosnih, vojnih, ekonomskih, diplomatskih, tehnoloških i ostalih resursa za postizanje sigurnosnih ciljeva.

U segmentu razvoja i održavanja IKT sistema za obradu, prijenos i pohranu tajnih podataka, aktivnosti Ministarstva će biti usmjerene na pripremu legislative kojom se reguliše ova oblast. U pitanju je donošenje **Odluke o izmjenama i dopunama Odluke o određivanju državnih organa za informatičku sigurnost IKT sistema za obradu, prijenos i pohranu tajnih podataka**. Ovom Odlukom, baziranom na Zakonu o zaštiti tajnih podataka, određuju se državni organi za informatičku sigurnost navedenog sistema, koji djeluje u okviru Ministarstva sigurnosti tj. Sektora za zaštitu tajnih podataka - Državnog sigurnosnog organa i ujedno, definišu aktivnosti i obaveze nadležnih institucija.

Znatan dio aktivnosti Sektora za zaštitu tajnih podataka, usmjeren je na izradu dva veoma važna podzakonska akta i to **Pravilnika o postupcima izdavanja sigurnosnog odobrenja i akreditacije sistema informaciono-komunikacionih tehnologija za obradu, prijenos i pohranu tajnih podataka, u skladu sa zakonskim ovlaštenjima, te Pravilnika o kriptozastiti u IKT sistemima za obradu, prijenos i pohranu tajnih podataka, u skladu sa zakonskim nadležnostima**.

Prvim Pravilnikom, propisuje se postupak izdavanja sigurnosnog odobrenja ili akreditacije sistema informaciono-komunikacionih tehnologija (IKT-a) na kojima se obrađuju, pohranjuju i prenose tajni podaci stepena tajnosti „INTERNO“, „POVJERLJIVO“, „TAJNO“ i „VRLO TAJNO“ ili njihovi ekvivalenti koji su na snazi u drugim državama, međunarodnim ili regionalnim organizacijama, uključujući NATO i Evropsku uniju, za koje je Bosna i Hercegovina ovlaštena da ih koristi u skladu sa potpisanim međunarodnim sporazumima. Drugim Pravilnikom, propisuje se postupak kriptozastite u IKT sistemima na kojima se obrađuju, pohranjuju i prenose tajni podaci stepena tajnosti „INTERNO“, „POVJERLJIVO“, „TAJNO“ i „VRLO TAJNO“ ili njihovi ekvivalenti koji su na snazi u drugim državama, međunarodnim ili regionalnim organizacijama, uključujući NATO i Evropsku uniju, za koje je Bosna i Hercegovina ovlaštena da ih koristi u skladu sa potpisanim međunarodnim sporazumima.

U narednom periodu se nastavljaju i aktivnosti na ispunjavanju uvjeta za rad sa tajnim podacima od strane pravosudnih organa u Bosni i Hercegovini. Ministarstvo nastavlja saradnju na provedbi Sporazuma između Bosne i Hercegovine i Evropske unije o sigurnosnim procedurama za razmjenu povjerljivih informacija i Sporazuma o zaštiti i razmjeni tajnih podataka između Bosne i Hercegovine i Sjevernoatlantske organizacije. Imajući u vidu zakonske nadležnosti, vezane za izvršavanje prihvaćenih međunarodnih obaveza i ugovora o zaštiti tajnih podataka, te saradnju sa nadležnim organima drugih država, međunarodnih ili regionalnih organizacija, postoji stvarna potreba izmjene **Pravilnika o unutrašnjoj organizaciji i sistematizaciji Ministarstva sigurnosti Bosne i Hercegovine** u cilju efikasnog i blagovremenog izvršavanja preuzetih obaveza.

Aktivnosti ovog Ministarstva u pogledu razvoja informaciono-komunikacionih sistema, obuhvataju unapređenje, administraciju i održavanje postojećih IKT Sistema tj. **Sistema automatske identifikacije putem otisaka prstiju (AFIS-a), Sistema za zakonito presretanje telekomunikacija, Informacionog sistema migracija, te razvoj Sistema za upravljanje dokumentima - DMS-a (Document Management System-a).**

U skladu sa Odlukom Vijeća ministara Bosne i Hercegovine, izradiće se **Odluka o imenovanju članova Radne grupe za provođenje zadataka iz nadležnosti Zajedničkog upravnog odbora za zakonito presretanje telekomunikacija i načinu izvršavanja aktivnosti - ZUO-a**. Ovom Odlukom, navedena Radna grupa će biti popunjena za nedostajuće članove i ujedno, nastaviti svoje aktivnosti u punom sastavu

Slijedi i donošenje nove **Odluke o posebnim obavezama pravnih i fizičkih lica koja pružaju telekomunikacijske usluge, administriraju mreže i vrše telekomunikacijske djelatnosti u pogledu osiguranja i održavanja kapaciteta, koji će omogućiti ovlaštenim agencijama da vrše zakonito presretanje telekomunikacija, kao i kapaciteta za čuvanje i osiguranje telekomunikacijskih podataka**.

Budući da je Bosna i Hercegovina opredjeljena za pristupanje Evropskoj uniji, ona se ujedno obavezala na unapređenje cyber sigurnosti. U tom procesu, javna uprava je jedan od ključnih faktora za razvoj informacionog društva i zahtjeva izradu **Zakona o kritičnoj infrastrukturi u institucijama Bosne i Hercegovine**. Ovim zakonom, uređuje se kritična infrastruktura Bosne i Hercegovine, identifikacija i određivanje kritične infrastrukture, zaštita kritične infrastrukture, nadležnost i odgovornost organa i organizacija u oblasti kritične infrastrukture, upravljanje i nadzor u oblasti kritične infrastrukture, te druga pitanja.

Bosna i Hercegovina još uvijek nema osigurane osnovne pretpostavke za cyber sigurnost i provođenje obaveza iz centralnog akta o cyber sigurnosti Evropske unije iz 2016. godine, što implicira donošenje **Odluke o uspostavljanju mreže CERT-ova kao jedinstvene kontakt tačke Bosne i Hercegovine za cyber sigurnost** u najkraćem mogućem roku.

U domenu međunarodne saradnje, Ministarstvo provodi niz aktivnosti, vezanih za realizaciju preuzetih obaveza iz međunarodnih ugovora, sporazuma, konvencija i rezolucija, čija je potpisnica Bosna i Hercegovina. Ove aktivnosti obuhvataju: usklađivanje i izradu propisa i drugih akata, vođenje pregovaračkih procesa i pokretanje procedura za zaključivanje ugovora na globalnom, regionalnom i bilateralnom nivou, te pristupanje Bosne i Hercegovine međunarodnim ugovorima, njeno predstavljanje, izvještavanje o ostvarenom napretku, obuku i upućivanje pripadnika policijskih službi iz Bosne i Hercegovine u operacije podrške miru i druge aktivnosti.

Kontinuirano se provodi procedura izbora predstavnika Bosne i Hercegovine u EUROPOL-u (Evropski policijski ured), SELEC-u (Centar za saradnju službi za provođenje zakona JIE), MARRI-u (Regionalna inicijativa za migracije, azil i izbjeglice) i druge međunarodne organizacije i inicijative. Uslijediće i nastavak planiranih aktivnosti sa FRONTEX-om, nakon potpisivanja **Statusnog sporazuma između Evropske unije i Bosne i Hercegovine o aktivnostima koje provodi Agencija za evropsku graničnu i obalnu stražu (FRONTEX) na prostoru Bosne i Hercegovine**.

Kada je riječ o mirovnim misijama UN-a, Bosna i Hercegovina trenutno ima raspoređene policijske službenike u dvije mirovne misije i to u Južnom Sudanu i Kipru. Redovno se provode sve aktivnosti, vezane za njihovu pripremu, obuku, selekciju, upućivanje, rotacije i povratak iz mirovnih misija.

Dva puta godišnje izrađuje se **Izveštaj o učešću predstavnika Bosne i Hercegovine u operacijama podrške miru i drugim aktivnostima u inostranstvu** (u pitanju je objedinjeni izvještaj Ministarstva sigurnosti i Ministarstva odbrane), koje Predsjedništvo Bosne i Hercegovine i Vijeće ministara Bosne i Hercegovine, podnose Parlamentarnoj skupštini Bosne i Hercegovine.

U skladu sa **Sporazumom o saradnji u oblasti obuke između Ministarstva sigurnosti i Ministarstva odbrane**, ovo Ministarstvo i Centar za obuku za mirovne misije (PSOTC) Oružanih snaga BiH, organizuju i provode predmisionu obuku jednom godišnje, a po potrebi i dva puta, u cilju odgovarajuće pripreme policijskih službenika za učešće u mirovnim misijama UN-a. U planu je realizacija još nekoliko obuka o različitim aspektima mirovnih misija, koje su predviđene godišnjim programom obuka u PSOTC-u. Svake dvije godine, UN-ov Tim za procjenu i podršku procesu izbora kandidata/kandidatkinja (SAAT) za učešće u mirovnim misijama, provodi testiranje za policijske službenike iz Bosne i Hercegovine, radi upućivanja u mirovne misije UN-a.

Testiranje će biti obavljeno i 2024. godine, u skladu sa dostavljenim potrebama i obavezama SAAT Tima. Svake godine se izrađuje i dostavlja Ministarstvu vanjskih poslova BiH **Informacija Bosne i Hercegovine o OSCE-ovom Kodeksu ponašanja u vojno-političkim aspektima sigurnosti** (u dijelu koji se odnosi na nadležnosti Ministarstva sigurnosti Bosne i Hercegovine i upravnih organizacija u njegovom sastavu).

Programskim aktivnostima iz domena zaštite i spašavanja, planirana je uspostava baze podataka o resursima zaštite i spašavanja u Bosni i Hercegovini, harmonizacija metodologija za procjenu rizika od prirodnih ili drugih nesreća, te izrada strateških dokumenata. Kontinuirano se prate i organizuju redovne godišnje sjednice sa predstavnicima institucija zaštite i spašavanja iz zemalja regije (Stalna mješovita komisija), posebno u slučajevima prirodnih ili drugih nesreća. Saradnja se ostvaruje i sa nadležnim institucijama na globalnom nivou i ujedno, realizuju međunarodne obaveze Bosne i Hercegovine u oblasti zaštite i spašavanja, te ispunjavaju obaveze prema NATO-u u domenu civilnog planiranja za vanredne situacije. Redovno se organizuje i godišnji forum u funkciji **Platforme za smanjenje rizika od katastrofa u Bosni i Hercegovini**, te obilježavaju značajni datumi iz domena zaštite i spašavanja.

Poglavlje 5: Resursi i kapaciteti potrebni za postizanje ciljeva

5.1. Predviđeni izvori finansiranja

Troškovi koji nastaju u toku realizacije Srednjoročnog programa rada Ministarstva, spadaju u sljedeće osnovne kategorije: bruto plate i naknade, naknade troškova uposlenih, izdaci za materijal i usluge, tekući grantovi (transferi) i kapitalna ulaganja. Za primjenu programa i pripadajućih projekata u cilju realizacije prioriteta i srednjoročnog cilja, definisanog Srednjoročnim programom rada Ministarstva sigurnosti BiH za period 2025-2027. godina, planirano je ukupno 35. 527.000 KM sredstava iz budžeta institucija Bosne i Hercegovine ili po periodima realizacije – 2025. godina 12.206.000 KM, 2026. godina 11.635.000 KM i 2027. godina 11.686.000 KM.

5.2. Organizacioni kapaciteti

Ministarstvo sigurnosti Bosne i Hercegovine trenutno ima **179 uposlenika** (od toga po spolnoj strukturi, **99 žena i 80 muškarca**), što u odnosu na **249** pozicija, predviđenih Pravilnikom o unutrašnjoj organizaciji i sistematizaciji Ministarstva čini **71, 89 %** od planiranog broja zaposlenih.

U narednom periodu, očekuje se izrada novog **Pravilnika o unutrašnjoj organizaciji i sistematizaciji Ministarstva sigurnosti Bosne i Hercegovine**, u skladu sa odlukama Vijeća ministara BiH i potrebama ove institucije u cilju optimizacije radnog procesa i zadataka. U razdoblju 2025-2027. godina, Ministarstvo će kontinuirano raditi na jačanju i razvoju kadrovskih kapaciteta kroz edukaciju, specijalizirane i redovne obuke Agencije za državnu službu Bosne i Hercegovine.

Poglavlje 6: Okvir za praćenje provođenja plana i evaluaciju rezultata

Srednjoročni program rada predstavlja okvir rada Ministarstva sigurnosti Bosne i Hercegovine, jer definiše prioritete, potrebe, srednjoročni cilj i viziju ključnih segmenata rada u narednom trogodišnjem periodu. Ovaj Srednjoročni plan bi trebao da pruži sistematski i održiv pristup u pogledu utvrđivanja prioriteta, planiranja i raspodjele resursa, demonstrira institucionalnu spremnost pred ključnim izazovima, te osigura mehanizme za pregled i kontrolu učinka i u uslovima restriktivnog budžetiranja. Prilikom izrade Srednjoročnog plana rada Ministarstva, određuju se ključni pokazatelji koji služe za mjerenje napretka u ostvarivanju rezultata na nivou projekata, programa i ciljeva, odnosno programskih i kadrovskih projekcija organizacionih jedinica Ministarstva za period 2025-2027. godina i stoga, ne bi trebao da bude shvaćen kao statičan, već dinamičan dokument.

Na stepen realizacije planiranog programa i projekata utiče više faktora, te činjenica da je napredak u sigurnosnom sektoru u Bosni i Hercegovini moguć samo uz visok nivo saradnje i koordinacije ključnih aktera. Iz tog razloga, Srednjoročni plan rada Ministarstva treba da pruži smjernice djelovanja ove institucije, informira i upućuje na saradnju njegove strateške partnere, kako bi zajedno, ostvarili viziju u kojoj se građani Bosne i Hercegovine osjećaju sigurnije i u najvećoj mjeri zaštićeni od kriminala i korupcije. U postupku realizacije prioriteta Srednjoročnog plana rada, provodi se proces praćenja, čiji je cilj uočavanje eventualnih odstupanja od plana, odnosno dostizanje postavljenog cilja. Praćenje realizacije Srednjoročnog plana rada Ministarstva, vrši se putem redovnih godišnjih izvještaja.

Izvještaji o provedbi Srednjoročnog plana rada izrađuju se u predviđenom formatu, te dostavljaju Ministarstvu finansija i trezora BiH i Direkciji za ekonomsko planiranje BiH u utvrđenim rokovima. Evaluacija provedbe Srednjoročnog plana, vrši se svake tri godine. Analiza postavljenih pokazatelja i ostvarenih rezultata daje konačnu ocjenu uspješnosti provedbe Srednjoročnog plana rada Ministarstva. Izvještaji o evaluaciji Srednjoročnog plana Ministarstva, dostavljaju se Ministarstvu finansija i trezora Bosne i Hercegovine i Direkciji za ekonomsko planiranje Bosne i Hercegovine u utvrđenim rokovima.

Poglavlje 6.1. Definisanje ključnih pokazatelja

Srednjoročni cilj - Unapređenje sigurnosnog sektora u nadležnosti institucija Bosne i Hercegovine, sa aspekta odgovornosti i efikasnosti, u skladu sa zakonskim nadležnostima

Pokazatelj uspjeha: 1) Stepen realizacije planiranih aktivnosti i harmonizacije propisa

Izvori verifikacije: Izvještaj Evropske komisije za Bosnu i Hercegovinu, zakoni, podzakonski akti, strateški dokumenti, akcioni planovi, informacije o provođenju politika, informacije o stanju sigurnosti u Bosni i Hercegovini, sistem za rano upozoravanje Ministarstva sigurnosti BiH, javne rasprave i pribavljena mišljenja relevantnih institucija i akademske zajednice.

Pokazatelji ostvarenih rezultata:

Ministarstvo sigurnosti BiH redovno i kontinuirano izvršava sve svoje obaveze i programske zadatke. Osnovni zaključci prethodnog *Izvještaja o provođenju Programa rada za 2023. godinu*, pokazuju da je Ministarstvo u izvještajnom periodu imalo 221 programski zadatak, čija je realizacija na kraju godine ostvarena u procentu od 77 %. Na drugoj strani, Vijeće ministara Bosne i Hercegovine usvojilo je 139 zaključaka, vezanih za ovo Ministarstvo (od čega se 25 odnosi na poslanička pitanja), koji su skoro u potpunosti ispunjeni. Dodamo li tome i znatan broj realizovanih aktivnosti, koje nisu bile predviđene ni Godišnjim, ni Srednjoročnim planom rada, onda je jasno da Ministarstvo sigurnosti Bosne i Hercegovine nastavlja tendenciju praćenja aktuelnih sigurnosnih izazova u Bosni i Hercegovini i pokazuje spremnost na ad hoc reagovanje.

Doprinos ostvarenju srednjoročnih ciljeva, ogleda se u usvajanju **Zakona o pranju novca i finansiranju terorističkih aktivnosti** na Vijeću ministara Bosne i Hercegovine 14. decembra 2023. godine, a dva mjeseca kasnije i u oba doma Parlamentarne skupštine Bosne i Hercegovine. Usvajanjem ovog Zakona, spriječen je negativan izvještaj MONEYVAL-a i ujedno ispunjen jedan od uvjeta čelnika Evropskog vijeća da Bosni i Hercegovini odobre pristupne pregovore sa Evropskom unijom.

Prethodno je Vijeće ministara Bosne i Hercegovine usvojilo **Dopunu procjene rizika od pranja novca i finansiranja terorizma i njen Akcioni plan za period 2022-2024. godina**, te **Strategiju za borbu protiv organizovanog kriminala u Bosni i Hercegovini za period 2023-2026. godina**. Potom su realizirane i dvije veoma važne aktivnosti ovog Ministarstva, koje se ogledaju u usvajanju **Zakona o izmjenama i dopunama Zakona o strancima**, objavljenom u "Službenom glasniku Bosne i Hercegovine", broj: 63/23, te **Akcionog plana Strategije u oblasti migracija i azila za period 2021-2025. godina**.

Na 20. sjednici Vijeća ministara Bosne i Hercegovine, održanoj 23. 08. 2023. godine, prihvaćen je **Akcioni plan** prethodno usvojene **Strategije za prevenciju i borbu protiv terorizma za period 2021-2026. godina**. Uz navedeno, realizovan je i cijeli niz aktivnosti iz oblasti migracija, koje nisu bile predviđene Programom rada za 2023. godinu, te usvojena **Polugodišnja informacija o provođenju Plana mjera i aktivnosti za efikasno upravljanje migrantskom krizom u Bosni i Hercegovini**. Koordinaciono tijelo za provođenje strateških dokumenata iz oblasti granične sigurnosti, izradilo je **Prijedlog Strategije integrisanog upravljanja granicom u Bosni i Hercegovini i njenog Akcionog plana za period 2024-2029. godina**.

Poglavlje 6. 2. Metode za prikupljanje informacija o pokazateljima

Ministarstvo sigurnosti BiH prikuplja informacije iz svih raspoloživih izvora o pokazateljima rezultata i pokazateljima uspjeha. Prikupljanje informacija o realizaciji postavljenih ciljeva i definisanih pokazatelja vrši se kontinuirano kroz cjelokupno razdoblje, kako bi se provjerio odnos postignutih rezultata i zacrtanih ciljeva. Radi praćenja i evaluacije Srednjoročnog plana rada Ministarstva, definisani su ključni pokazatelji za svaki pojedinačni projekat, te polazne i ciljne vrijednosti pokazatelja. Praćenje provedbe plana na godišnjem nivou, podrazumjeva prikupljanje relevantnih informacija o definisanim pokazateljima, te njihovu usporedbu s ciljanim vrijednostima. Na ovaj način, Ministarstvo dobija jasne i pravovremene informacije o realizaciji srednjoročnih aktivnosti u određenom razdoblju, ali i vrijeme u kojem može ispitati razloge eventualnih odstupanja, te provesti različite korektivne i preventivne mjere.

6.3. Osnovni zaključci prethodnog Izvještaja o provođenju plana rada

Obaveza izrade Srednjoročnog plana rada institucija Bosne i Hercegovine uvedena je **Odlukom o postupku srednjoročnog planiranja, praćenja i izvještavanja u institucijama BiH** (*Službeni glasnik BiH*^{*}, broj: 62/14) i primjenjuje se od 1. januara 2015. godine. U izvještaju za protekli period (2021–2022. godina), zaključeno je da je Ministarstvo sigurnosti napravilo značajne korake u realizaciji svog srednjoročnog cilja – **“Unapređenje sigurnosnog sektora u nadležnosti institucija Bosne i Hercegovine, sa aspekta odgovornosti i efikasnosti”**, kroz realizaciju programskih aktivnosti, koje direktno utiču na realizaciju strateškog cilja – **“Transparentan, efikasan i odgovoran javni sektor”** i prioriteta – **“Ojačati vladavinu prava, sigurnost i osnovna prava”**. Ministarstvo će i u narednom srednjoročnom periodu nastaviti svoje aktivnosti na unapređenju sigurnosnog sektora, saradnji sa međunarodnim sigurnosnim institucijama, policijskim agencijama koje djeluju u sastavu ovog Ministarstva, te entitetskim ministarstvima unutrašnjih poslova.

Od Ministarstva sigurnosti se očekuje da direktno učestvuje u realizaciji specifičnih i konkretnih mjera na kojima insistira Evropska unija, te da aktivno radi na onim obavezama, koje proističu iz **Strategije i Akcionog plana za reformu javne uprave**. Postoji niz obaveza koje Bosna i Hercegovina treba ispuniti na svom putu ka evropskim integracijama i u tom kontekstu, od Ministarstva se očekuje da u narednom periodu, u okviru svog mandata, intenzivira rad u sljedećim oblastima: zaštita granica, migracije i azil, zaštita i spašavanje, zaštita tajnih podataka, zaštita elektronskih podataka, opća sigurnost, borba protiv svih oblika kriminala, terorizma i korupcije, te primjena IKT sistema u svim oblastima iz nadležnosti Ministarstva sigurnosti Bosne i Hercegovine.

Poglavlje 7: Prilozi

Prilog 1: Akcioni plan Srednjoročnog programa rada Ministarstva sigurnosti Bosne i Hercegovine

Prilog 2: Pregled zakona, drugih propisa i razvojno-investicionih projekata / programa, predviđenih Srednjoročnim programom rada Ministarstva sigurnosti Bosne i Hercegovine



Zamjenik ministra sigurnosti
Ivica Bošnjak

	A	B	C	D	E	F	G	H	I	J	K	N	O	P	Q	R	S	T	U	V	W
	Strukturni cilj	Specifični ciljevi	Program	Projekt	Institucija odgovorna za implementaciju	Pokazatelj	Mjerenja (%; broj)	Polazna vrijednost 2024. godina	Ciljana vrijednost 2025. godina	Ciljana vrijednost 2026. godina	Ciljana vrijednost 2027. godina	Procijenjeni troškovi 2025. godina	Procijenjeni troškovi 2026. godina	Procijenjeni troškovi 2027. godina	Ukupno (troškovi)	Budžet	Kredit	Donacije	Ostali izvori	Ukupno	Program u DOB-u
7				Projekt 1.1.1.4	Ministarstvo sigurnosti BiH	Stepen realizacije planiranih aktivnosti	%	75	80	83	85				5.459.000	5.459.000	-	-	-	5.459.000	41010
15				Projekt 1.1.1.5	Ministarstvo sigurnosti BiH	Stepen realizacije planiranih aktivnosti	%	75	80	83	85				1.957.000	1.957.000	-	-	-	1.957.000	
16				Projekt 1.1.1.6	Ministarstvo sigurnosti BiH	Stepen realizacije planiranih aktivnosti	%	75	78	80	83				2.540.000	2.540.000	-	-	-	2.540.000	
17				Projekt 1.1.1.7	Ministarstvo sigurnosti BiH	Stepen realizacije planiranih aktivnosti	%	75	78	80	83				5.119.000	5.119.000	-	-	-	5.119.000	
18				Projekt 1.1.1.8	Ministarstvo sigurnosti BiH	Stepen realizacije planiranih aktivnosti	%	75	78	80	85				5.234.000	5.234.000	-	-	-	5.234.000	41010
19				Projekt 1.2.2.1	Ministarstvo sigurnosti BiH	Stepen realizacije planiranih aktivnosti	%	75	78	80	85				5.234.000	5.234.000	-	-	-	5.234.000	41010
20				Projekt 1.2.2.2	Ministarstvo sigurnosti BiH	Stepen realizacije planiranih aktivnosti	%	75	78	80	85				5.234.000	5.234.000	-	-	-	5.234.000	41010
21				Projekt 1.2.2.3	Ministarstvo sigurnosti BiH	Stepen realizacije planiranih aktivnosti	%	75	78	80	85				5.234.000	5.234.000	-	-	-	5.234.000	41010
22				Projekt 1.2.2.4	Ministarstvo sigurnosti BiH	Stepen realizacije planiranih aktivnosti	%	75	78	80	85				5.234.000	5.234.000	-	-	-	5.234.000	41010
23				Projekt 1.2.2.5	Ministarstvo sigurnosti BiH	Stepen realizacije planiranih aktivnosti	%	75	78	80	85				5.234.000	5.234.000	-	-	-	5.234.000	41010

PREGLED ZAKONA, DRUGIH PROPISA I RAZVOJNO-INVESTICIONIH PROJEKATA/PROGRAMA, PREDVIĐENIH SREDNJOROČNIM PLANOM RADA MINISTARSTVA SIGURNOSTI BIH 2025-2027. GODINA

Strateški cilj:		Transparentan, efikasan i odgovoran javni sektor						
Prioritet:		Ojačati vladavinu prava, sigurnost i osnovna prava						
1	2	3	4	5	6	7	8	9
Srednjoročni cilj	Specifični ciljevi	Programi	ZAKONI	PODZAKONSKI AKTI	Usklađivanje s pravnim naslijeđem EU-a (DA ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
Unapređenje sigurnosnog sektora u nadležnosti institucija BiH sa aspekta odgovornosti i efikasnosti	Specifični cilj 1 Unapređenje međunarodne saradnje i perspektiva BiH u oblasti sigurnosne politike i zaštita društva od nezakonitih aktivnosti i krivičnih djela, uz praćenje i analizu svih oblasti iz nadležnosti institucije	Odgovoran i efikasan sigurnosni sektor i saradnja sa međunarodnim institucijama u oblasti sigurnosti	Zakon o graničnoj kontroli Bosne i Hercegovine		DA	2025 2026 2027		
			Zakon o kritičnoj infrastrukturi u institucijama Bosne i Hercegovine		DA	2025 2026 2027		
			Zakon o izmjenama i dopunama Zakona o strancima		DA	2025 2026 2027		
			Zakon o izmjenama i dopunama Zakona o azilu		DA	2025 2026 2027		

Srednjoročni cilj	Specifični ciljevi	Programi	ZAKONI	PODZAKONSKI AKTI	Uskladivanje s pravnim naslijeđem EU-a (DA ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
			Zakon o izmjenama i dopunama Zakona o sprečavanju i suzbijanju zloupotrebe opojnih droga		DA	2025 2026 2027		
				Pravilnik o izmjenama i dopunama Pravilnika o ulasku i boravku stranaca	DA	2025 2026 2027		
				Pravilnik o određivanju graničnih prijelaza	DA	2025 2026 2027		
				Pravilnik o određivanju privremenih graničnih prijelaza	DA	2025 2026 2027		
				Pravilnik o standardima i uslovima izgradnje i opremanja graničnih prijelaza	DA	2025 2026 2027		

Srednjoročni cilj	Specifični ciljevi	Programi	ZAKONI	PODZAKONSKI AKTI	Usklađivanje s pravim naslijeđem EU-a (DA, I/II, NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
				Pravilnik o postupku utvrđivanja i rješavanja povreda državne granice i graničnog incidenta	DA	2025 2026 2027		
				Pravilnik o uslovima i načinu određivanja područja graničnih prijelaza	DA	2025 2026 2027		
				Pravilnik o načinu obavljanja kontrole prenošenja oružja i municije preko državne granice	DA	2025 2026 2027		
				Pravilnik o izmjenama i dopunama Pravilnika o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekursora	NE	2025 2026 2027		

Srednjoročni cilj	Specifični ciljevi	Programi	ZAKONI	PODZAKONSKI AKTI	Usklađivanje s pravnim naslijedom EU-a (DA, ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
				Pravilnik o postupcima izdavanja sigurnosnog odobrenja i akreditacije sistema informaciono- komunikacionih tehnologija za obradu, prijenos i pohranu tajnih podataka u skladu sa zakonskim nadležnostima	DA	2025 2026 2027		
				Pravilnik o kriptu zaštiti u IKT sistemima za obradu, prijenos i pohranu tajnih podataka, u skladu sa zakonskim nadležnostima	DA	2025 2026 2027		
				Odluka o najmanjem iznosu sredstava, potrebnom za izdržavanje stranaca za vrijeme namjeravanog boravka u Bosni i Hercegovini	NE	2025 2026 2027		
				Prijedlog nove Sigurnosne politike Bosne i Hercegovine	NE	2025 2026 2027		

Srednjoročni cilj	Specifični ciljevi	Programi	ZAKONI	PODZAKONSKI AKTI	Usklađivanje s pravnim naslijedom EU-a (DA ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
				Odluka o određivanju graničnih prijelaza u Bosni i Hercegovini	DA	2025 2026 2027		
				Odluka o usvajanju Plana civilno - vojne sараdње u slučaju odgovora na terorističke napade i saniranje njihovih posljedica, u skladu sa zakonskim nadležnostima	NE	2025 2026 2027		
				Odluka o formiranju međuagencijske Radne grupe za koordinaciju aktivnosti na definisanju, uskladjivanju i stvaranju zakonodavnih, operativnih, tehničkih, kadrovskih i finansijskih uslova za implementaciju API / PNR sistema	DA	2025 2026 2027		
				Odluka o uspostavi Radne grupe za izradu Strategije za prevenciju i borbu protiv terorizma (2027-2031. godina)	NE	2027		

Srednjoročni cilj	Specifični ciljevi	Programi	ZAKONI	PODZAKONSKI AKTI	Usklađivanje s pravim naslijeđen EU-a (DA ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
				Odluka o usvajanju Strategije za prevenciju i borbu protiv terorizma (2027-2031. godina)	NE	2027		
				Odluka o određivanju državnih organa za informatičku sigurnost sistema za obradu, prijenos i pohranu tajnih podataka	DA	2025 2026 2027		
				Odluka o dopuni liste opojnih droga, psihotropnih tvari, biljaka iz kojih se može dobiti opojna droga i prekursora	NE	2025 2026 2027		
				Odluka o imenovanju članova Radne grupe za provođenje zadataka iz nadležnosti Zajedničkog upravnog odbora za zakonito prestanje telekomunikacija i načinu izvršavanja aktivnosti ZUO-a	NE	2025 2026 2027		

Srednjoročni cilj	Specifični ciljevi	Programi	ZAKONI	PODZAKONSKI AKTI	Usklađivanje s pravnim naslijedom Eu-a (DA ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
				Odluka o posebnim obavezama pravnih i fizičkih lica, koja pružaju telekomunikacijske usluge, administriraju mreže i vrše telekomunikacijske djelatnosti u pogledu osiguranja i održavanja kapaciteta, koji će omogućiti ovlaštenim agencijama da vrše zakonito prestranje telekomunikacija, kao i kapaciteta za čuvanje i osiguranje telekomunikacijskih podataka	NE	2025 2026 2027		
				Odluka o uspostavljanju mreže CERT-ova kao jedinstvene kontakt tačke Bosne i Hercegovine za cyber sigurnost	DA	2025 2026 2027		
				Podzakonski akti koji će se donositi po usvajanju Zakona o izmjenama i dopunama Zakona o azilu	DA	2025 2026 2027		
				Akcionni plan za provođenje Strategije za kontrolu malog oružja i lakog naoružanja za period 2025.-2026. godina	DA	2025 2026 2027		

Srednjoročni cilj	Specifični ciljevi	Programi	ZAKONI	PODZAKONSKI AKTI	Usklađivanje s pravim, nasliedom EU-a (DA ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
				Akcioni plan za provođenje Strategije za kontrolu malog oružja i lakog naoružanja za period 2027-2028. godina	DA	2027		
				Strategija i Akcioni plan za kontrolu malog oružja i lakog naoružanja za period 2025 -2030. godina	DA	2025 2026 2027		
				Akcioni plan za provođenje Strategije integriranog upravljanja granicom u Bosni i Hercegovini za period 2026 -2027. godina	DA	2025 2026 2027		